

Morning Dogri (NSD) National News Bulletin 23-08-2024

आकाशवाणी

1. प्रधानमंत्री नरेन्द्र मोदी होर अज्ज यूक्रेन दी इक दिनै दी यात्रा पर किएव पुज्जगंन।
2. रक्षा मंत्री राजनाथ सिंह होर अमरीका दे विदेश मंत्री हुंदे साददे पर अमरीका दी चऊं दिनें दी यात्रा पर कल संजा वाशिंगटन पुज्जी गे।
3. मुख्य भरै च अज्ज पैह्ला राश्ट्री अंतरिक्ष दिवस मनाया जा'रदा ऐ।
4. प्रधानमंत्री मोदी होर औंदे ऐतवारें 25 अगस्त गी दिनै 11 बजे आकाशवाणी पर अपने "मन की बात" कार्यक्रम राएं देशवासिएं कन्नै बचार सांझे करगंन।
5. रूस दे राश्ट्रपति ब्लादिमीर पुतिन होरें आखेआ ऐ जे यूक्रेन दी फौजै कुरस्क परमाणु संयंत्र पर हमले दी कोशश कीती ऐ।

<><><><><><>

PM-Ukrain

प्रधानमंत्री नरेन्द्र मोदी होर अज्ज यूक्रेन दी यात्रा पर किएव पुज्जगंन। श्री मोदी राश्ट्रपति बोलोदिमीर जेलंस्की हुंदे कन्नै डेलीगेशन स्तरै दी गल्लबात करगंन। एह गल्लबात मेद ऐ जे मुख्य तौर पर यूक्रेन संघर्ष दा हल तुप्पने पर केन्द्रित होई सकदी ऐ। यात्रा थमां पैहले श्री मोदी होरें आखेआ जे भारत दा पक्का विश्वास ऐ जे जंग कन्नै कुसै बी समस्या दा हल नेई निकली सकदा। उनें आखेआ जे ओह खेत्तर च रमानदारी ते स्थिरता दी ब्हाली लेई हर मुमकन सैह्योग देने गी तैआर न। श्री मोदी होरें कल वारसों च पोलैंड दे प्रधानमंत्री डॉनल्ड टस्क हुंदे कन्नै गल्लबात परेंत एह टिप्पणी कीती। दौनें नेताएं आखेआ जे सब्बने मुख्यें गी कुसै बी मुख्य दी इलाकाई अखंडता ते संप्रभुता जां सियासी आजादी खलाफ ताकत दे इस्तेमाल थमां बचना लोड़चदा। श्री मोदी होरें आखेआ जे यूक्रेन ते पच्छिम एशिया च जारी संघर्ष साढ़े सब्बने लेई बड़्डी चैंता दा विशे ऐ।

<><><><><><>

PM-Poland

प्रधानमंत्री नरेन्द्र मोदी होरें पोलैंड दी अपनी ऐतिहासक यात्रा दा समापन वारसॉ च अपने पोलैंड दे हमरूतबा डॉनल्ड टस्क ते राष्ट्रपति आंद्रेज सेबेस्टियन डूडा हुंदे नै बैठक मगरा कीता। श्री मोदी होरें पोलैंड दी अपनी यात्रा गी खास दस्सेआ ते मध्य यूरोपीय राष्ट्र गी भारत दा भरोसेमंद दोस्त दस्सेआ। सोशल मीडिया पोस्ट च प्रधानमंत्री मोदी होरें आखेआ जे इस यात्रा नै इक भरोसेमंद मित्र दे कन्नै आपसी सैहयोग गी डूहंगा करने दा मौका दित्ता ऐ। उनें आखेआ जे साढ़ी दोस्ती जकीनी तौरा पर इक बेहतर दुनिया दे निर्माण च योगदान देई सकदी ऐ। श्री मोदी होरें पोलैंड दे लोकें ते सरकार गी, उंदी गर्मजोशी लेई धन्नबाद बी दित्ता।

<><><><><><>

UN Modi

संयुक्त राष्ट्र दे महासचिव अंतोनियो गुतरश होरें मेद जाहर कीती ऐ जे प्रधानमंत्री नरेन्द्र मोदी हुंदी यूक्रेन यात्रा उत्थें जारी संघर्ष गी खत्म करने च मददगार साबत होग। महा सचिव हुंदे प्रवक्ता स्टीफन दुजारिक होरें आखेआ जे जंग दे मण्टै मोदी हुंदी यूक्रेन यात्रा कन्नै संघर्ष खत्म होने दी मेद ऐ।

<><><><><><>

Rajnath Singh

रक्षामंत्री राजनाथ सिंह अमरीका दे विदेश मंत्री हुंदे साददे पर अमरीका दी चऊं दिनें दी यात्रा पर कल संजा वाशिंग्टन पुज्जी गे। इस दरान श्री सिंह होर अमरीका दे अपने हमरूतबा हुंदे कन्नै दपक्खी बैठक करगन ते अमरीकी राष्ट्री सुरक्षा सलाहकार जैक सुलिवन हुंदे नै बी मलाटी करगन। रक्षा मंत्री होर अमरीका दे रक्षा उद्योग दे प्रतिनिधिएं कन्नै मजूदा समें च चलै करदे ते भविष्य च होने आले होरने कार्यक्रमें पर बी इक उच्च स्तरी गोलमेज बैठक दी प्रधानता करगन। अमरीका नै भारती फौज दे आधुनिकरण रस्ता ते औद्योगिक सैहयोग लेई भारत ते अमरीका बश्कार सैहयोग बधाने आले कार्यक्रमें लेई समर्थन देने दी वचनबद्धता दोहराई ऐ।

<><><><><><>

Space day

मुख्य भरै च अज्ज पैहला राश्ट्री अंतरिक्ष दिवस मनाया जा'रदा ऐ। राष्ट्रपति द्रौपदी मुर्मू होर नमीं दिल्ली च स्थित भारत मंडपम च मुख्य समारोह दा उद्घाटन करगंन। राश्ट्रीय अंतरिक्ष दिवस दा इस ब'रे दा विशे-सार ऐ "चन्द्रमा दा स्पर्श करदे होई जीवन दे प्रति साजग होना-भारत दी अंतरिक्ष गाथा"। एह विशे-सार समाज ते टैक्नालोजी पर अंतरिक्ष दी खोज दे गैहरे असर पर लोह पांदा ऐ। अज्जै दे इस ध्याड़े पर राष्ट्रपति होर रोबोटिकस चैलेंज ते भारती अंतरिक्ष टैकथॉन दे जेत्तुएं गी सम्मानत करगंन। पिछले ब'रे अज्जै दे ध्याड़े चन्द्रयान-3 मिशन दे तैहत भारत दा विक्रम लैंडर चन्न दी सतह पर सुरक्षत हेठ उतरेआ हा। इस उपलब्धि दे कन्नै भारत चन्न दी सतह पर उतरने आला चौथा मुख्य ते चन्न दे दक्खनी ध्रुव पर उतरने आला पैहला मुख्य बनी गेआ हा जेहड़ी थाहरै पर विक्रम लैंडर हेठ उतरेआ हा, उसी शिवशक्ति प्वाइंट नां दित्ता गेआ ते 23 अगस्त गी राश्ट्री अंतरिक्ष ध्याड़ा घोषत करी दित्ता गेआ हा।

<><><><><><>

PM-MKB

प्रधानमंत्री नरेन्द्र मोदी होर औंदे ऐतवारे आकाशवाणी पर प्रसारत होने आले "मन की बात" कार्यक्रम राएं लोकें कन्नै अपने बचार सांझा करगंन। एह इस रेडिया कार्यक्रम दी 113मीं कड़ी होग। प्रधानमंत्री नरेन्द्र मोदी हुंदे आस्सेआ लगातार त्रीह बारी प्रधानमंत्री दा औहदा संभालने मगरा एह त्रिया मन की बात कार्यक्रम होग। एह कार्यक्रम आकाशवाणी ते दूरदर्शन दे सारे नेटवर्क, आकाशवाणी समाचार दी वैबसाइट ते न्यूज ऑन एयर ऐप पर बी कन्नो कन्नी प्रसारत कीता जाग। इस कार्यक्रम दा लाइव प्रसारण आकाशवाणी समाचार, डीडी न्यूज, प्रधानमंत्री हुंदे दफतर ते सूचना ते प्रसारण मंत्रालय दे यू ट्यूब चैनलें पर बी कीता जाग। आकाशवाणी पर हिंदी प्रसारण दे तुरत मगरा एहदा क्षेत्रीय भाषाएं च बी प्रसारण कीता जाग।

<><><><><><>

Putin

रूस दे राष्ट्रपति ब्लादिमीर पुतिन होरें आखेआ जे यूक्रेनी सेना नै कुरस्क क्षेत्र च चला'रदे अपने हमले दरान कुरस्क परमाणु ऊर्जा प्लांट पर हमला करने दी कोशश कीती ही। कैबिनेट दी बैठक च पुतिन होरें आखेआ जे अंतर्राष्ट्रीय परमाणु ऊर्जा प्लांट अजेंसी गी सूचित करी दित्ता गेआ ऐ ते उनें हालात दा आंकलन करने लेई आपूं औने ते माहिरें गी भेजने दा

वायदा कीता ऐ। इत्थें एह गल्ल ध्यानजोग ऐ जे इस म्हीने दी शुरुआत च ज्हारें यूक्रेनी सैनिकें कुरस्क क्षेत्र च दाखल होए हे। रूस नै इस हमले गी आतंकवादी कारवाई घोशत कीता ऐ ते बलें गी पिच्छे हटने लेई बाद्ध सैनिकें गी तैनात कीता ऐ।

<><><><><><>

Vice Prez

उपराष्ट्रपति जगदीप धनखड़ होर अज्ज गुजरात दे अहमदाबाद ते गांधी नगर दा दौरा करगन। अपने इक रोजा दौरे दरान उपराष्ट्रपति गांधी नगर च राष्ट्रीय फोरेंसिक विज्ञान ते संकाय सदस्यें गी संबोधत करगन। मगरा धनखड़ होर अहमदाबाद च गुजरात यूनिवर्सिटी च धर्म-धाम अंतर्राष्ट्रीय सम्मेलन च बी हिस्सा लैगन। इस मौके पर गुजरात दे राज्यपाल आचार्य देवव्रत ते मुख्मन्त्री भूपेन्द्र पटेल बी मजूद रौंहगन।

<><><><><><>

Vaishnav Waves

सूचना ते प्रसारण मंत्री अश्विनी वैष्णव नै विश्व आडियो विजुअल ते मनोरंजन शिखर सम्मेलन थमां पैहले नमीं दिल्ली च क्रिएट इन इंडिया चैलेंज सीजन दी शुभारंभ कीता। इस मौके पर बोलदे होई वैष्णव होरें आखेआ जे भारतीय अर्थबवस्था दे विकास ते तकनीकी प्रगति दे असर गी दर्शादे होई 25 पैहलकदमियां चुनौतियां शुरु कीती गई न। उनें आखेआ जे मीडिया ते मनोरंजन उद्योग बी विकसित होआ ऐ। जेहदे नै क्रिटर इकोनामी गी मते हदें तगर बढ़ावा मिलेआ ऐ। मंत्री होरें आखेआ जे इस क्रिएटर इकोनामी गी प्रधानमंत्री नरेन्द्र मोदी होरें मान्यता दित्ती, जिनें पैहला राष्ट्रीय क्रिएटर पुरस्कार प्रदान कीता।

<><><><><><>

ESIC

सरकारै आखेआ ऐ जे इस बरे जून म्हीने च कर्मचारी राज्य बीमा योजना तैहत 21 लक्ख 67 जहार नमें कर्मचारिएं गी नामांकित कीता गेआ ऐ। पिछले बरे दी इससै अवधि दी तुलना च नमें कर्मचारिएं दी गिनतरी च 7 फीसद दा इजाफा दर्ज कीता गेआ।



Neeraj Chopra

नीरज चोपड़ा स्विट्ज़रलैंड च लुसाने डायमंड लीग प्रतियोगिता च मर्दे दे नेजा सुट्टने दे मकाबले च दूई थाहरे पर रेह न। नीरज होरें अपने सीजन दा सब्बने शा श्रेष्ठ 89.49 मीटर तगर नेजा सुट्टेआ।



Women Cricket

इंग्लैंड ते वेल्स क्रिकेट बोर्ड नै तसदीक कीती ऐ जे पैह्ला महिला टैस्ट मैच ब'रे 2026 च लाड्स क्रिकेट स्टेडियम च भारत ते इंग्लैंड बश्कार खेड्डेआ जाग। ईसीबी दे मुख् कार्जकारी अधिकारी रिचर्ड गोल्ड होरें आखेआ जे ओह भारत ते इंग्लैंड बश्कार खेड्डे जाने आले इस मैच गी लेइयै खुश ते उत्साहित न। तोआई भारती महिला क्रिकेट टीम अगले ब'रे इंग्लैंड च 5 टी-20 मैच ते 2 इक दिवसीय मैच खेड्डोग।

